

Basel, 1. März 1550

An Hieronymus Baumgartner

UB Cambridge Add. 712, Nr. 82.

S. P. D. Mitto Excellentiae tuae Demosthenis a me conuersi codicem, non quod te dignum munus esse aut tibi necessarium putem, qui ante me natum, vt opinor, Demosthenem longè melius quam ego nunc, intellexisti, sed in obseruantiae erga te meae qualemque argumentum, neque inire gratiam hoc chartaceo munuscule, sed gratum animum significare studeo. Quàm sedulò causam meam in senatu egeris, quamque honorificè et planè supra dignitatem meam, de me praedicare soleas, è D. Iulio et Bruschio poeta, satis intellexi, magnaqué cum voluptate audiui. Quid enim iucundius esse mihi possit, quam tanto probari viro? Cum igitur Isocratis interpretationem minus elaboratam non sis aspernatus: spero Demosthenem etiam, cui, quantum in tanta breuitate temporis et alijs impedimentis licuit, plus impendi laboris et diligentiae, humanitati tuae spero non fore ingratum, vel eo nomine, quod praestantissimus autor hactenus in paucorum manibus versatus, nunc etiam a mediocriter literatis siue in sua, siue in latina lingua legi poterit, et in scholis etiam pueris discendus proponi, quem hactenus ipsi magistri rarò attigerunt. Dignum videbatur hoc opus, quod ampliss[imo] vestro senatui a me dicaretur. sed me hoc vnum profectò deterruit, quod metui, ne τὰ τῶν πτωχῶν δῶρα, ita vti ferè sunt, ἀδωρα haberentur. Neque vero committendum esse videbatur, vt non tam officij habuisse rationem, quam tanta clarissimae ciuitatis liberalitate non contentus, nouum captasse praemium putarer. Vale. Basileae Cal[endis] Martij Anno 1550.

Excellentiae Tuae
Obseruantiss[imus]
Hiero[nymus] Wolfius.